

**- UPRAVNI ODBOR -**

Broj: 02-4-4/20.

Sarajevo, 24. 12. 2019. godine

Z A P I S N I K
SA 22. REDOVNE SJEDNICE UPRAVNOG ODBORA INTEGRIRANOG
UNIVERZITETA U SARAJEVU
ODRŽANE 24. 12. 2019. GODINE S POČETKOM U 14:00 SATI

Prisutni članovi Upravnog odbora: dr. sc. Murat Ramadanović, predsjednik, dr. sc. Mersiha Slipičević, gđa Sandra Začinović, prof. dr. Jasminka Gradašćević-Sijerčić, prof. dr. Dijana Avdić, prof. dr. Kasim Bajrović, prof. dr. Abidin Deljanin i Mirsad Kadić.

Odsutni članovi Upravnog odbora: gosp. Sifet Kukuruz, prof. ddr. Lidija Zvačko i akad. prof. dr. Dejan Milošević.

Ostali prisutni: prof. dr. Rifat Škrijelj, rektor Univerziteta u Sarajevu, prof. dr. Tarik Zaimović, prorektor za finansije, prof. dr. Maida Čohodar-Husić, prorektorica za kvalitet, prof. dr. Aida Hodžić, prorektorica za nastavu i studentska pitanja, prof. dr. Dženana Husremović, prorektorica za naučnoistraživački rad, prof. dr. Sahrudin Sarajčić, izvršni direktor Univerziteta u Sarajevu, gosp. Ekrem Čagalj, rukovodilac Jedinice za internu reviziju Univerziteta u Sarajevu, gosp. Kenan Filipović, rukovodilac Službe za pravne poslove Univerziteta u Sarajevu, Belma Hajradinović, stručna saradnica za pravne poslove Univerziteta u Sarajevu.

Ostali odsutni: prof. dr. Aleksandra Nikolić, prorektorica za međunarodnu saradnju, prof. Sanja Burić, prorektorica za umjetnost, kulturu i sport, i dr. sc. Suvad Konaković, generalni sekretar Univerziteta u Sarajevu.

Zasjedanje je počelo u 14:00 sati.

Dr. sc. Murat Ramadanović, predsjednik Upravnog odbora Univerziteta u Sarajevu, konstatirao je da postoji potreban kvorum za odlučivanje, te da sjednici prisustvuje 8 (osam) članova Upravnog odbora, nakon čega je otvorio 22. redovnu sjednicu Upravnog odbora Univerziteta u Sarajevu (dalje: Upravni odbor).

U daljnjem toku sjednice dr. sc. Murat Ramadanović, predsjednik Upravnog odbora, pozvao je prof. dr. Sahrudina Sarajčića, izvršnog direktora Univerziteta u Sarajevu, da informira članove Upravnog odbora o naknadno dostavljenom materijalu o izmjeni i dopuni Plana javnih nabavki integriranog Univerziteta u Sarajevu za 2019. godinu u dijelu: Rektorat. S tim u vezi, Upravni odbor Univerziteta u Sarajevu je dao saglasnost da isti bude razmatran zbog hitnosti, nakon čega je dr. sc. Murat Ramadanović konstatirao da će isti biti razmatran pod tačkom 3.b).

Nadalje, prof. dr. Murat Ramadanović je predložio da se u okviru tačke „Tekuća pitanja“ članovi Upravnog odbora upoznaju sa zahtjevom Raiffeisen banke o zaključivanju ugovora sa Univerzitetom u Sarajevu, koji za predmet reguliranja ima rezervaciju parking-mjesta za potrebe Banke i njenih zaposlenika, a u skladu sa tarifom utvrđenom u Odluci Upravnog odbora Univerziteta u Sarajevu broj: 02-14-490/12 od 14. 05. 2012. godine o izmjeni Odluke o utvrđivanju cijene usluga koje vrši Univerzitet u Sarajevu – Rektorat, broj: 02-1-606/08 od 21. 02. 2008. godine.

Uz prijedloge dopuna, Upravni odbor je *jednoglasno*, sa 8 (osam) glasova „za“, usvojio izmijenjeni i dopunjeni dnevni red, kako *s l i j e d i*:

D N E V N I R E D

1. Usvajanje Zapisnika sa 21. redovne sjednice Upravnog odbora Univerziteta u Sarajevu od 28. 11. 2019. godine
2. Realizacija odluka i zaključaka sa prethodnih sjednica Upravnog odbora Univerziteta u Sarajevu
Izvjestilac: Kenan Filipović, rukovodilac Službe za pravne poslove Univerziteta u Sarajevu
3. Prijedlozi organizacionih jedinica za izmjene i dopune Plana javnih nabavki integriranog Univerziteta u Sarajevu za 2019. godinu:
 - a) Šumarski fakultet
 - b) Rektorat**Izvjestilac: prof. dr. Sahrudin Sarajčić, izvršni direktor Univerziteta u Sarajevu**
4. Utvrđivanje cijene školarine:
 - a) jednogodišnji interdisciplinarni master-studij *Nacionalna sigurnost i demokratsko društvo* (4 + 1) na Fakultetu političkih nauka Univerziteta u Sarajevu za 2019/2020. studijsku godinu
 - b) drugi ciklus studija *Urbana poljoprivreda* na Poljoprivredno-prehrambenom fakultetu Univerziteta u Sarajevu**Izvjestilac: prof. dr. Aida Hodžić, prorektorica za nastavu i studentska pitanja Univerziteta u Sarajevu**
5. Informacija o poduzetim aktivnostima u vezi sa Zaključkom Upravnog odbora broj: 02-95-16/19 od 24. 10. 2019. godine, kojim se od Vijeća Elektrotehničkog fakulteta Univerziteta u Sarajevu tražilo da ponovo razmatra i odluči o nastavnoj potrebi i o pitanju produženja radnog odnosa prof. dr. Zikrije Avdagića, cijeneći nastavnu potrebu za angažmanom imenovanog i nastavnu opterećenost nastavnog osoblja na Odsjeku za računarstvo i informatiku Elektrotehničkog fakulteta Univerziteta u Sarajevu u skladu sa Standardima i normativima za obavljanje djelatnosti visokog obrazovanja na području Kantona Sarajevo
Izvjestilac: Kenan Filipović, rukovodilac Službe za pravne poslove Univerziteta u Sarajevu
6. Prigovor podnositeljice Nermine Selak na Odluku dekana Prirodno-matematičkog fakulteta Univerziteta u Sarajevu, akt broj: 01/01-2855/7-2019 od 28. 11. 2019. godine, o prijemu u radni odnos na poslovima higijeničarke na Prirodno-matematičkom fakultetu

Izjavitelj: Kenan Filipović, rukovodilac Službe za pravne poslove Univerziteta u Sarajevu

7. Zahtjev Općine Centar za rješavanje imovinsko-pravnih odnosa (po zahtjevu podnosioca Hajrudina Bahte) u svrhu legalizacije pomoćnog objekta, garaže sa ostavom, u Ulici Himze Polovine broj 11; predmetni objekat sagrađen je na zemljištu označenom kao k.č. 547, nastala od k. č. 414, površine 22 m², upisana u zk.ul. 223 k.o. Sarajevo – Mahala LXVIII, državna svojina sa upisanim nosiocem prava raspolaganja u korist Univerziteta, NR BiH, Sarajevo

Izjavitelj: Kenan Filipović, rukovodilac Službe za pravne poslove Univerziteta u Sarajevu

8. Tekuća pitanja:

- a) Realizacija Ugovora o radu sa rukovodiocem organizacione jedinice Univerziteta u Sarajevu doc. dr. Amelom Kosovcem, dekanom Fakulteta za saobraćaj i komunikacije Univerziteta u Sarajevu
- b) Odluka o izmjeni Odluke o provođenju redovnog popisa imovine, obaveza i potraživanja Univerziteta u Sarajevu za 2019. godinu broj: 02-88-3/19 od 19. 09. 2019. godine
- c) Informacija o neizvršenju Zaključka Upravnog odbora broj: 02-105-14/19 od 28. 11. 2019. godine i Zaključka Senata broj: 01-35-113/19 od 27. 11. 2019. godine
- d) Zahtjev za izmjenu Odluke o imenovanju projektnog menadžera i izvršilaca poslova Jedinice za implementaciju projekta „Izgradnja i opremanje biblioteke Univerziteta u Sarajevu“ broj: 02-8026/16 od 27. 12. 2016. godine
- e) Ugovor o zakupu vanjskog prostora u okviru Kampusa Univerziteta u Sarajevu, Ulica Zmaja od Bosne broj 8, površine od 580 m², između Univerziteta u Sarajevu, koji zastupa prof. dr. Rifat Škrijelj, rektor Univerziteta u Sarajevu, i Raiffeisen Leasing d. o. o. Sarajevo, koji zastupaju Maja Jurčević, direktorica, i Belma Hodžić, izvršna direktorica

TOK SJEDNICE

Ad-1.

Upravni odbor je bez prethodne diskusije *jednoglasno*, sa 8 (osam) glasova „za“, usvojio Zapisnik sa 21. redovne sjednice Upravnog odbora Univerziteta u Sarajevu održane 28. 11. 2019. godine.

Ad-2.

U okviru tačke „Realizacija odluka i zaključaka sa prethodnih sjednica Upravnog odbora Univerziteta u Sarajevu“ prisutni članovi Upravnog odbora su informirani o realiziranim odlukama i zaključcima u formi tabelarnog prikaza.

U dijelu tačke 2.a) prof. dr. Melika Husić-Mehmedović, direktorica Centra za interdisciplinarnu studiju Univerziteta u Sarajevu, dostavila je informaciju o pregledu aktivnosti na programu ERMA – *Evropski regionalni magistarski program iz ljudskih prava i demokratije u jugoistočnoj Evropi* u studijskoj 2019/2020. godini. S tim u vezi, Upravni odbor je *jednoglasno*, sa 8 (osam) glasova „za“, donio s l j e d e ć i

ZAKLJUČAK

1. Upravni odbor Univerziteta u Sarajevu prihvata informaciju prof. dr. Melike Husić-Mehmedović, direktorice Centra za interdisciplinarnе studije Univerziteta u Sarajevu, o pregledu aktivnosti na programu ERMA – *Evropski regionalni magistarski program iz ljudskih prava i demokratije u jugoistočnoj Evropi* u studijskoj 2019/2020. godini za period od novembra do decembra 2019. godine, sa tromjesečnim planom trošenja sredstava za period od novembra do januara 2020. godine (planirano) i od novembra (ostvareno), akt broj: 769/19 od 11. 12. 2019. godine.
2. Informacija i tromjesečni planovi trošenja sredstava iz tačke 1. ovog zaključka čine sastavni dio ovog zaključka.

Nadalje, u dijelu tačke 2.b) dostavljena je informacija o angažmanu prof. dr. Samira Čauševića na Sveučilištu u Mostaru, te zahtjev i prateća dokumentacija, shodno ranije donesenom Zaključku Upravnog odbora kojim su obavezani generalni sekretar Univerziteta u Sarajevu i Služba za pravne poslove da do održavanja naredne sjednice dostave informaciju, uz prateću dokumentaciju, o angažmanu prof. dr. Samira Čauševića na Sveučilištu u Mostaru.

S tim u vezi, dr. sc. Murat Ramadanović, predsjednik Upravnog odbora Univerziteta u Sarajevu, otvorio je kraću diskusiju u kojoj su učesće uzeli: prof. dr. Jasminka Gradašćević-Sijerčić, prof. dr. Abidin Deljanin i prof. dr. Rifat Škrijelj, rektor Univerziteta u Sarajevu.

Prof. dr. Jasminka Gradašćević-Sijerčić je istakla da se analizom tabelarnog prikaza o realiziranim odlukama i zaključcima može zaključiti da je većina odluka i zaključaka koje je Upravni odbor donio realizirana (80% odluka i zaključaka), te da je mali procent odluka i zaključaka koji nisu realizirani (uz naznaku da su to akti kojima se rješavaju određena pitanja, zahtjevi, prigovori na Medicinskom fakultetu).

U odnosu na dokumentaciju o angažmanu prof. dr. Samira Čauševića na Sveučilištu u Mostaru prof. dr. Jasminka Gradašćević-Sijerčić je istakla da je Odluka rukovodioca organizacione jedinice o davanju saglasnosti za angažman prof. dr. Samira Čauševića na Sveučilištu u Mostaru donesena 02. 07. 2019. godine za studijsku 2018/2019. godinu, na osnovu čega se može zaključiti da je naknadno data saglasnost. Nadalje, prof. dr. Jasminka Gradašćević-Sijerčić ističe da se postupak disciplinske odgovornosti ne može tražiti nakon isteka roka od šest mjeseci od datuma saznanja za povredu obaveze i počinioca, shodno odredbama člana 124. Zakona o visokom obrazovanju („Službene novine Kantona Sarajevo“, broj: 33/17) (u daljnjem tekstu: Zakon), te konstatira da je neophodno donijeti zaključak kojim će se ograničiti organizacione jedinice da do određenog roka daju potrebu saglasnost za angažman, a u skladu sa odredbom člana 117. Zakona.

U odnosu u navode prof. dr. Jasminke Gradašćević-Sijerčić prof. dr. Rifat Škrijelj napominje da je u praksi uočeno da pojedine organizacione jedinice ne dostavljaju blagovremeno zahtjev sa propisanom dokumentacijom, odnosno prije početka semestra u okviru kojeg se planira angažman nastavnog osoblja, te konstatira da podržava prijedlog prof. dr. Jasminke Gradašćević-Sijerčić, ali da rok koji će biti utvrđen zaključkom mora biti realan, kako bi se obaveze mogle izvršiti blagovremeno.

Prof. dr. Abidin Deljanin je konstatirao da je zahtjev u formi obrasca za davanje saglasnosti za angažman podnesen 28. 05. 2019. godine, ali da navodi u zahtjevu nisu tačni, te da je prof. dr. Samir Čaušević, redovni profesor Fakulteta za saobraćaj i komunikacije Univerziteta u

Sarajevu, angažiran na Sveučilištu u Mostaru na devet predmeta, a ne na šest, kako je to naznačeno u zahtjevu, uz napomenu da isti nije zaveden na matičnom fakultetu. Pored navedenog, prof. dr. Abidin Deljanin ističe da je Odluka o davanju saglasnosti za angažman donesena retroaktivno, odnosno u periodu kad je okončan semestar u okviru kojeg je imenovani profesor bio angažiran u nastavi. S tim u vezi, prof. dr. Abidin Deljanin je istakao da je zbog niza uočenih nepravilnosti u radu podnio krivičnu prijavu protiv prethodnog rukovodioca Fakulteta za saobraćaj i komunikacije Univerziteta u Sarajevu, ali da o istoj još uvijek nije dobio odgovor od nadležnog tužilaštva.

Nadalje, prof. dr. Rifat Škrijelj, rektor Univerziteta u Sarajevu, istakao je da zahtjev nije upućen rukovodstvu Univerziteta nego rukovodstvu organizacione jedinice, stoga je organizaciona jedinica koja je zaprimila zahtjev bila obavezna postupiti u skladu sa odredbama Zakona. Ukoliko su pojedincu bile poznate informacije o kršenju odredbi Zakona kojima se regulira pitanje davanja saglasnosti za angažiranje na drugoj visokoškolskoj ustanovi, u tom slučaju je isti bio dužan djelovati u utvrđenom roku.

U daljnjem toku diskusije prof. dr. Rifat Škrijelj, rektor Univerziteta u Sarajevu, istakao je da je prof. dr. Abidin Deljanin obnašao dužnost prodekana za finansije u toku mandata dekana prof. dr. Samira Čauševića, te da je, ukoliko je u tom periodu posjedovao dokaze o nezakonitim radnjama koje imaju obilježja krivičnog djela, odmah po saznanju trebao poduzeti sve potrebne radnje kako bi se utvrdila odgovornost za iste.

Na prijedlog prof. dr. Jasminke Gradašević-Sijerčić, Upravni odbor je *jednoglasno*, sa 8 (osam) glasova „za“, donio s l j e d e ć i

ZAKLJUČAK

Upravni odbor Univerziteta u Sarajevu, poštujući odredbe člana 117. Zakona o visokom obrazovanju („Službene novine Kantona Sarajevo”, broj: 33/17) kojima se utvrđuje obaveza da se kroz donošenje posebne odluke od rukovodioca visokoškolske ustanove/organizacione jedinice daje saglasnost za angažman na drugoj visokoškolskoj ustanovi, konstatira da je neophodno navedenu proceduru pribavljanja prethodne saglasnosti okončati prije početka studijske godine (najkasnije do 30. 09) za zimski semestar, a za ljetni semestar do kraja zimskog semestra studijske godine u kojoj se akademsko osoblje angažira.

Ad-3.

Upravnom odboru dostavljeni su prijedlozi organizacionih jedinica za izmjenu i dopunu Plana javnih nabavki integriranog Univerziteta u Sarajevu za 2019. godinu u dijelu:

- a) Šumarski fakultet
 - b) Rektorat
- a) Nakon uvodnih napomena od izvjestioca prof. dr. Sahrudina Sarajčića, izvršnog direktora Univerziteta u Sarajevu, a u vezi sa dostavljenim zahtjevima za izmjenu i dopunu planova javnih nabavki navedenih organizacionih jedinica za 2019. godinu, Upravni odbor je *jednoglasno*, sa 8 (osam) glasova „za“, donio s l j e d e ć u

ODLUKU

o izmjeni i dopuni Plana javnih nabavki integriranog Univerziteta u Sarajevu za 2019. godinu u dijelu: Šumarski fakultet

I

Utvrđuje se izmjena i dopuna Plana javnih nabavki integriranog Univerziteta u Sarajevu za 2019. godinu u dijelu organizacione jedinice Šumarskog fakulteta, usvojenog Odlukom Upravnog odbora Univerziteta u Sarajevu broj: 02-41/19 od 28. 02. 2019. godine, kao u tabeli koja se nalazi u prilogu i čini sastavni dio ove odluke.

II

Ova odluka stupa na snagu datumom donošenja, a bit će objavljena na internetskoj stranici Šumarskog fakulteta Univerziteta u Sarajevu.

b) Upravni odbor je *jednoglasno*, sa 8 (osam) glasova „za“, donio s l j e d e ć u

ODLUKU

o izmjeni i dopuni Plana javnih nabavki integriranog Univerziteta u Sarajevu (Rektorat i centri) za 2019. godinu

I

Utvrđuje se izmjena i dopuna Plana javnih nabavki integriranog Univerziteta u Sarajevu (Rektorat i centri) za 2019. godinu, usvojenog Odlukom Upravnog odbora Univerziteta u Sarajevu broj: 02-41/18 od 28. 02. 2019. godine, kao u tabeli koja se nalazi u prilogu i čini sastavni dio ove odluke.

II

Daje se ovlaštenje rektoru Univerziteta u Sarajevu da donese odluke o pokretanju postupka javne nabavke za robe i usluge navedene u tabeli koja je u prilogu ove odluke, te odluke o izuzeću od primjene Zakona o javnim nabavkama BiH za nabavke ugovora koji su izuzeti od primjene Zakona o javnim nabavkama BiH, a koji su navedeni u tabeli: nabavke na koje se ne primjenjuje Zakon o javnim nabavkama, koja je sastavni dio ove odluke.

Daje se ovlaštenje rektoru Univerziteta u Sarajevu da sa ponuđačima zaključi ugovore o pristupu akademskim bazama navedenim u tabeli: nabavke na koje se ne primjenjuje Zakon o javnim nabavkama, koja je sastavni dio ove odluke, te potpisuje svu finansijsku dokumentaciju u cilju izvršenja ugovorenih obaveza.

III

Ova odluka stupa na snagu datumom donošenja, a bit će objavljena na internetskoj stranici Univerziteta u Sarajevu.

Ad-4.

Shodno odredbama člana 49. stav (6) i člana 165. Zakona o visokom obrazovanju („Službene novine Kantona Sarajevo“, broj: 33/17), kojima je uređeno da Upravni odbor utvrđuje cijenu studija, Upravnom odboru dostavljeni su zahtjevi organizacionih jedinca za utvrđivanje cijena studija, kako slijedi:

- jednogodišnji interdisciplinarni master-studij *Nacionalna sigurnost i demokratsko društvo* (4 + 1) na Fakultetu političkih nauka Univerziteta u Sarajevu za 2019/2020. studijsku godinu
 - drugi ciklus studija *Urbana poljoprivreda* na Poljoprivredno-prehrambenom fakultetu Univerziteta u Sarajevu
- a) Bez prethodno provedene diskusije Upravni odbor je *jednoglasno*, sa 8 (osam) glasova „za“, donio s l j e d e ć u

O D L U K U

I

Utvrđuje se cijena jednogodišnjeg interdisciplinarnog studija *Nacionalna sigurnost i demokratsko društvo* (4 + 1) na Fakultetu političkih nauka Univerziteta u Sarajevu u iznosu od 1.000,00 KM (slovima: hiljadu KM) za jednu godinu, počevši od studijske 2019/2020. godine.

II

Ova odluka stupa na snagu datumom donošenja i primjenjuje se u studijskoj 2019/2020. godini.

- b) Bez prethodno provedene diskusije Upravni odbor je *jednoglasno*, sa 8 (osam) glasova „za“, donio s l j e d e ć u

O D L U K U

I

Utvrđuje se visina školarine drugog ciklusa studija pod nazivom *Urbana poljoprivreda* na Poljoprivredno-prehrambenom fakultetu Univerziteta u Sarajevu u trajanju od dvije godine u iznosu od 4.000,00 KM po godini studija, za studente koji sami snose troškove studija.

II

Ova odluka stupa na snagu datumom donošenja i primjenjuje se u studijskoj 2019/2020. godini.

Ad-5.

Upravnom odboru Univerziteta u Sarajevu ponovo je na razmatranje dostavljena žalba prof. dr. Zikrije Avdagića na Odluku dekana Elektrotehničkog fakulteta Univerziteta u Sarajevu o prestanku radnog odnosa zbog ispunjavanja uvjeta za odlazak u penziju broj: 0101-8349/19 od 08. 10. 2019. godine.

Naime, Upravni odbor Univerziteta u Sarajevu je, razmatrajući predmetnu žalbu, na 20. redovnoj sjednici koja je održana 24. 10. 2019. godine donio Zaključak kojim se obavezuje Vijeće Elektrotehničkog fakulteta Univerziteta u Sarajevu da ponovo razmotri i odluči o nastavnoj potrebi i produženju radnog odnosa prof. dr. Zikrije Avdagića, cijeneći nastavnu potrebu za angažmanom imenovanog i nastavnu opterećenost nastavnog osoblja na Odsjeku za računarstvo i informatiku Elektrotehničkog fakulteta Univerziteta u Sarajevu u skladu sa

Standardima i normativima za obavljanje djelatnosti visokog obrazovanja na području Kantona Sarajevo.

S tim u vezi, Vijeće Elektrotehničkog fakulteta Univerziteta u Sarajevu je donijelo Odluku broj: 01-5858/19 od 09. 12. 2019. godine kojom se ne usvaja prijedlog Vijeća Odsjeka za računarstvo i informatiku.

U odnosu na navedeno otvorena je kraća diskusija u kojoj su učešće uzeli prof. dr. Jasminka Gradašćević-Sijerčić i prof. dr. Rifat Škrijelj, rektor Univerziteta u Sarajevu.

Za riječ se javila prof. dr. Jasminka Gradašćević-Sijerčić koja je istakla da je Vijeće Elektrotehničkog fakulteta Univerziteta u Sarajevu donijelo Odluku kojom se ne podržava prijedlog Odsjeka za računarstvo i informatiku, te da ne postoji nastavna potreba za angažiranjem prof. dr. Zikrije Avdagića za realizaciju nastave na gore spomenutom odsjeku, uz naznaku da je to drugi uvjet za produženje radnog odnosa.

Nadalje, prof. dr. Jasminka Gradašćević-Sijerčić ističe da je Vijeće odbilo iskazanu potrebu Odsjeka za računarstvo i informatiku koje, shodno svojim nadležnostima, organizira nastavu u odnosu na raspoloživo osoblje, a u skladu sa nastavnim planom i programom na studijskim programima i iz predmeta za koje je Odsjek matičan. Zatim, napominje da parametri nastavne potrebe ne predstavljaju isključivo broj akademskog osoblja, kao ni broj sati, posebno cijeneći angažman na određenim projektima, kao i značaj i doprinos renomiranog člana akademskog osoblja koji je neophodan u nastavi kako zbog specifičnosti predmeta koje izvodi tako i zbog nemogućnosti adekvatne zamjene, što je izrečeno u zahtjevu Odsjeka za računarstvo i informatiku.

U daljnjem toku diskusije za riječ se javio prof. dr. Rifat Škrijelj, rektor Univerziteta u Sarajevu, koji je istakao da je navedeno postupanje rukovodstva organizacione jedinice dovelo do grubog kršenja prava prof. dr. Zikrije Avdagića, redovnog profesora Elektrotehničkog fakulteta Univerziteta u Sarajevu. Nadalje, prof. dr. Rifat Škrijelj, rektor Univerziteta u Sarajevu, podsjeća na slijed događa i akata koji su prethodili, pa ističe da je Vijeće Elektrotehničkog fakulteta Univerziteta u Sarajevu utvrdilo potrebu za produženjem radnog odnosa u februaru 2019. godine, a zatim dekan te organizacione jedinice donosi Odluku broj: 02-4147/19 od 20. 09. 2019. godine kojom stavlja van snage Odluku Vijeća Elektrotehničkog fakulteta Univerziteta u Sarajevu broj: 01-467/19 od 04. 02. 2019. godine kojom se usvaja prijedlog Vijeća Odsjeka za računarstvo i informatiku, akt broj: 08-424/19 od 01. 02. 2019. godine, te utvrđuje da postoji nastavna potreba za produženjem radnog odnosa dr. Zikrije Avdagića, redovnog profesora Elektrotehničkog fakulteta u Sarajevu, do kraja studijske 2020/2021. godine.

Naknadnim postupanjem nastoji se opravdati postupanje koje je dovelo do povrede prava prof. dr. Zikrije Avdagića, što zapravo znači da je vraćanje Vijeću na ponovno odlučivanje i donošenje Odluke da se odbija prijedlog Odsjeka za računarstvo i informatiku opravdalo donošenje Odluke dekana Elektrotehničkog fakulteta Univerziteta u Sarajevu o prestanku radnog odnosa zbog ispunjavanja uvjeta za odlazak u penziju broj: 0101-8349/19 od 08. 10. 2019. godine.

U daljnjem toku sjednice za riječ se javila prof. dr. Jasminka Gradašćević-Sijerčić koja je predložila da se prihvati žalba prof. dr. Zikrije Avdagića kao osnovana, zbog stavljanja u nepovoljniji položaj prof. dr. Zikrije Avdagića, redovnog profesora Elektrotehničkog fakulteta, na osnovu temeljnog principa jednakosti u mogućnostima i tretmanu akademskog osoblja na integriranom Univerzitetu u Sarajevu.

Upravni odbor je *jednoglasno*, sa 8 (osam) glasova „za“, donio s l j e d e ć u

O D L U K U

1. Prihvata se žalba prof. dr. Zikrije Avdagića na Odluku dekana Elektrotehničkog fakulteta Univerziteta u Sarajevu o prestanku radnog odnosa zbog ispunjavanja uvjeta za odlazak u penziju broj: 0101-8349/19 od 08. 10. 2019. godine *kao osnovana*.
2. Poništava se Odluka dekana Elektrotehničkog fakulteta Univerziteta u Sarajevu o prestanku radnog odnosa zbog ispunjavanja uvjeta za odlazak u penziju broj: 02-4248/19 od 26. 09. 2019. godine.

Ad-6.

Upravnom odboru Univerziteta u Sarajevu dostavljen je prigovor podnositeljice Nermine Selak na Odluku dekana Prirodno-matematičkog fakulteta Univerziteta u Sarajevu, akt broj: 01/01-2855/7-2019 od 28. 11. 2019. godine, o prijemu u radni odnosu na poslovima higijeničarke na Prirodno-matematičkom fakultetu.

Bez prethodne diskusije Upravni odbor je *jednoglasno*, sa 8 (osam) glasova „za“, donio s l j e d e ć i

Z A K L J U Č A K

Odbacuje se prigovor podnositeljice Nermine Selak, akt zaveden pod brojem: 0101-11473/19 od 05. 12. 2019. godine, na Odluku dekana Prirodno-matematičkog fakulteta Univerziteta u Sarajevu broj: 01/01-2855/7-2019 od 28. 11. 2019. godine o zasnivanju radnopravnog odnosa na poslovima higijeničarke na Prirodno-matematičkom fakultetu Univerziteta u Sarajevu kao formalno-pravno neispravan *zbog nenadležnosti*.

Ad-7.

U okviru tačke 7. razmatran je Zahtjev Općine Centar za rješavanje imovinsko-pravnih odnosa (po zahtjevu podnosioca Hajrudina Bahte) u svrhu legalizacije pomoćnog objekta, garaže sa ostavom, u Ulici Himze Polovine broj 11; predmetni objekat sagrađen je na zemljištu označenom kao k.č. 547, nastala od k. č. 414, površine 22 m², upisana u zk.ul. 223 k.o. Sarajevo – Mahala LXVIII, državna svojina sa upisanim nosiocem prava raspolaganja u korist Univerziteta, NR BiH, Sarajevo.

S tim u vezi, Upravni odbor je *jednoglasno*, sa 8 (osam) glasova „za“, donio s l j e d e ć i

Z A K L J U Č A K

1. Upravni odbor konstatira da je prije donošenja odluke po predmetu – postupajući na osnovu Zahtjeva Općine Centar broj: 05/A-31-282/19 kojim je zatražena saglasnost za utvrđivanje prava vlasništva u svrhu legalizacije pomoćnog objekta sa ostavom u korist podnosioca (Hajrudina Bahte), označenom kao k.č. 547, nastala od k. č. 414, površine 22 m², upisana

u zk.ul. 223 k.o. Sarajevo – Mahala LXVIII, državna svojina sa upisanim nosiocem prava raspolaganja u korist Univerziteta, NR BiH, Sarajevo – potrebno isti uputiti Pravobranilaštvu Kantona Sarajevo na davanje mišljenja.

2. Zadužuje se Univerzitet u Sarajevu da Zahtjev Općine Centar iz tačke 1. ovog zaključka uputi Pravobranilaštvu Kantona Sarajevo radi pribavljanja mišljenja.

Ad-8. Tekuća pitanja

- a) Upravni odbor Univerziteta u Sarajevu je dao saglasnost dr. sc. Muratu Ramadanoviću, predsjedniku Upravnog odbora Univerziteta u Sarajevu, za potpisivanje Ugovora o radu sa rukovodiocem organizacione jedinice Univerziteta u Sarajevu doc. dr. Amelom Kosovcem, a na osnovu člana 125. stav (5) Zakona o visokom obrazovanju („Službene novine Kantona Sarajevo“, broj: 33/17), kojim se utvrđuje dužnost Upravnog odbor da sa izabranim odnosno imenovanim licem za obavljanje dužnosti rukovodioca organizacione jedinice zaključi ugovor o radu.
- b) Upravni odbor Univerziteta u Sarajevu je, postupajući prema Uputstvu o radu popisnih komisija i obavljanju popisa sredstava, potraživanja i obaveza za 2019. godinu broj: 08-14-40015/19 od 18. 11. 2019. godine, a na prijedlog Centralne popisne komisije Univerziteta u Sarajevu, *jednoglasno* – sa 8 (osam) glasova „za“ – donio s l j e d e ć u

O D L U K U

o izmjeni Odluke

o provođenju redovnog popisa imovine, obaveza i potraživanja

Univerziteta u Sarajevu za 2019. godinu

I

U Odluci Upravnog odbora Univerziteta u Sarajevu broj: 02-88-3/19 od 19. 09. 2019. godine član 4. stav (1) i (2) mijenja se i glasi:

„(1) Pojedinačne komisije obavezne su izvršiti redovni godišnji popis imovine i obaveza do 15. 01. 2020. godine.

„(2) Pojedinačne komisije obavezne su svoje izvještaje dostaviti Centralnoj popisnoj komisiji do 20. 01. 2020. godine.“

II

U Osnovnoj odluci član 5. stav (1) mijenja se i glasi:

„(1) Rektor Univerziteta u Sarajevu i rukovodioci organizacionih jedinica su obavezni dostaviti Upravnom odboru na usvajanje Izvještaj Centralne popisne komisije najkasnije do 14. 02. 2020. godine.“

III

Ostale odredbe Osnovne odluke se ne mijenjaju i ostaju na snazi.

IV

Ova odluka stupa na snagu datumom donošenja.

- c) U okviru tačke „Tekuća pitanja“ dostavljena je informacija o neizvršenju Zaključka Upravnog odbora broj: 02-105-14/19 od 28. 11. 2019. godine i Zaključka Senata broj: 01-35-113/19 od 27. 11. 2019. godine od dr. sc. Fikreta Bečirevića. S tim u vezi, Upravni odbor Univerziteta u Sarajevu je *jednoglasno*, sa 8 (osam) glasova „za“, donio s l j e d e ć i

ZAKLJUČAK

1. Upravni odbor Univerziteta u Sarajevu je primio k znanju informaciju dostavljenu od Instituta za istraživanje zločina protiv čovječnosti i međunarodnog prava Univerziteta u Sarajevu broj: 736/I-19 od 16. 12. 2019. godine i zahtjev za izvršenje Zaključka Upravnog odbora broj: 02-105-14/19 od 28. 11. 2019. godine, upućen od dr. sc. Fikreta Bečirevića putem advokata Sanele Gorčić iz Sarajeva.
 2. Upravni odbor Univerziteta u Sarajevu ponovo zahtijeva od Vijeća Instituta za istraživanje zločina protiv čovječnosti i međunarodnog prava Univerziteta u Sarajevu da, u skladu sa Zakonom o naučnoistraživačkoj djelatnosti („Službene novine Kantona Sarajevo“, broj: 26/16) (u daljnjem tekstu: Zakon), omogući dr. sc. Fikretu Bečiroviću ostvarivanje prava u skladu sa članom 37. stav (7) navedenog zakona.
- d) U okviru tačke „Tekuća pitanja“ dostavljen je Zahtjev za izmjenju Odluke o imenovanju projektnog menadžera i izvršilaca poslova Jedinice za implementaciju projekta „Izgradnja i opremanje biblioteke Univerziteta u Sarajevu“ broj: 02-8026/16 od 27. 12. 2016. godine. S tim u vezi, Upravni odbor Univerziteta u Sarajevu je *jednoglasno*, sa 8 (osam) glasova „za“, donio s l j e d e ć u

ODLUKU

o izmjeni Odluke o imenovanju projekt menadžera i izvršilaca poslova Jedinice za implementaciju Projekta izgradnje i opremanja Univerzitetske biblioteke Univerziteta u Sarajevu broj: 02-8026/16 od 27. 12. 2016. godine

Član 1.

Član 2. Odluke o o izmjeni Odluke o imenovanju projekt menadžera i izvršilaca poslova Jedinice za implementaciju Projekta izgradnje i opremanja Univerzitetske biblioteke Univerziteta u Sarajevu broj: 02-8026/16 od 27. 12. 2016. godine (u daljem tekstu: Osnovna odluka) mijenja se i glasi:

„U Administrativni tim Jedinice za implementaciju Projekta izgradnje i opremanja Univerzitetske biblioteke Univerziteta u Sarajevu angažiraju se sljedeći izvršioци poslova:

- Dejana Maroš, dipl. ing.arh. trenutni sekretar administrativnog tima – za v.d. rukovodioca administrativnog tima, predstavnik Zavoda za izgradnju Kanton Sarajevo do konačnog prijedloga za imenovanje Zavoda za izgradnju Kantona Sarajevo;
- Semir Đulić, dipl.iur. pravni konsultant, stručni saradnik Direkcije za izgradnju i održavanja Univerziteta u Sarajevu;
- Aida Veladžić, dipl.ing.arh. i Goran Kurtović, dipl.ing.arh. kao pridruženi članovi administrativnog tima Implementacijske jedinice za krizne situacije, eksperti za procedure pravnih i upravnih procedura vođenja međunarodnih projekata, a posebno projekat prema metodologiji Saudijskog fonda za razvoj (SFD).

Član 2.

Ostale odredbe Osnovne odluke se ne mijenjaju i ostaju na snazi.

Član 3.

Ova Odluka stupa na snagu danom donošenja.

- e) U okviru tačke „Tekuća pitanja“ dostavljen je Ugovor o zakupu vanjskog prostora u okviru Kampusa Univerziteta u Sarajevu, Ulica Zmaja od Bosne broj 8, površine od 580 m², između Univerziteta u Sarajevu, koji zastupa prof. dr. Rifat Škrijelj, rektor Univerziteta u Sarajevu, i Raiffeisen Leasing d. o. o. Sarajevo, koji zastupaju Maja Jurčević, direktorica, i Belma Hodžić, izvršna direktorica. S tim u vezi, Upravni odbor Univerziteta u Sarajevu je *jednoglasno*, sa 8 (osam) glasova „za“, donio s l j e d e ć u

O D L U K U

I

Daje se saglasnost za zaključenje Ugovora o zakupu vanjskog prostora u okviru Kampusa Univerziteta u Sarajevu, Ulica Zmaja od Bosne broj 8, površine od 580 m², između Univerziteta u Sarajevu, koji zastupa prof. dr. Rifat Škrijelj, rektor Univerziteta u Sarajevu, i Raiffeisen Leasing d. o. o. Sarajevo, koji zastupaju Maja Jurčević, direktorica, i Belma Hodžić, izvršna direktorica.

II

Univerzitet u Sarajevu je dužan sredstva iz tačke 2. ove odluke u transparentnoj proceduri utrošiti namjenski u skladu sa Ugovorom iz tačke 1. ove odluke.

III

Ova odluka stupa na snagu datumom donošenja.

Audiozapis sa 22. redovne sjednice Upravnog odbora Univerziteta u Sarajevu pohranjen je u arhivi Univerziteta u Sarajevu i čini sastavni dio Zapisnika.

Sjednica je završena u 16:00 sati.

**PREDSJEDNIK
UPRAVNOG ODBORA**

Dr. sc. Murat Ramadanović

Zapisničar:

Belma Hajradinović, MA prava



Handwritten initials

Handwritten initials